

Vedlegg 24.

Forskrift om vern av Robøle naturreservat, Gol kommune, Buskerud

Fastsett ved kongeleg resolusjon 23. juni 2026 med heimel i lov 19. juni 2009 nr. 100 om forvaltning av naturens mangfold (naturmangfoldloven) § 34, § 37 og § 62 . Fremja av Klima- og miljødepartementet.

§ 1 *Føremål*

Føremålet med forskrifta er å ta vare på eit område som

- a. representerer ein bestemt type natur i form av kalkrik gammal barskog
- b. inneheld trua, sjeldan eller sårbar natur som kalk- og lågurtfuruskog, rik sandfuruskog og kalkgranskog med tilhøyrande artar av karplanter, lav og sopp
- c. har særleg betydning for biologisk mangfald ved å ha mange sjeldne og kravfulle kalkbarskogs-mykorrhizasopp knytt til tørre kontinentale skogtypar.

Det er eit mål å behalde verneverdiane i mest mogleg urørd tilstand, og eventuelt vidareutvikle dei.

§ 2 *Geografisk avgrensing*

Naturreservatet omfattar følgjande gnr./bnr.: Gol kommune: 7/1, 9/3, 10/1, 10/4, 13/6 og 23/48.

Naturreservatet dekker eit totalareal på 328 dekar. Grensene for naturreservatet går fram av vedlagte vernekart datert Klima- og miljødepartementet juni 2026. Dei nøyaktige grensene for naturreservatet skal merkast av i marka. Knekkpunkta skal koordinatfestast.

§ 3 *Vernereglar*

I naturreservatet må ingen gjere noko som skadar verneverdiane som går fram av føremålet med vernet.

I naturreservatet gjeld følgjande vernereglar:

- a. Vegetasjonen, medrekna daude buskar og tre, er verna mot skade og øydelegging. Det er forbode å fjerne planter og sopp medrekna lav eller deler av desse frå naturreservatet. Planting eller såing av tre og annan vegetasjon er forbode.
- b. Dyrelivet, medrekna reirplassar og hiområde, er verna mot skade, øydelegging og unødig forstyrring. Utsetting av dyr er forbode.
- c. Det må ikkje settast i verk tiltak som kan endre naturmiljøet, som til dømes oppføring av bygningar, anlegg, gjerde og andre varige eller midlertidige innretningar, parkering av campingvogner, brakker e.l., framføring av luftleidningar, jordkablar, kloakkleidningar, bygging av vegar, drenering eller anna form for tørlegging, uttak, oppfylling og lagring av masse, utføring av kloakk eller anna form for forureining, etterlating av avfall, gjødsling, kalking eller bruk av kjemiske utryddingsmiddel. Forsøpling er forbode. Opplistinga av tiltak er ikkje uttømmende.
- d. Bruk av naturreservatet til større arrangement er forbode.
- e. Brenning av bål er forbode. Forbodet gjeld ikkje bålbrenning med tørrkvist frå bakken eller medteken ved eller på tilrettelagte bålplassar, i samsvar med gjeldande lovverk.

§ 4 *Generelle unntak frå vernereglane*

Vernereglane i § 3 andre ledd er ikkje til hinder for

- a. sanking av bær og matsopp
- b. jakt og fangst i samsvar med gjeldande lovverk
- c. felling av store rovdyr i samsvar med gjeldande lovverk
- d. vedlikehald av eksisterande stiar og traktorvegar i samsvar med standard på vernetidspunktet. Traktorvegane er avmerkt på vedlagte vernekart
- e. beiting
- f. utsetting av saltstein
- g. oppsetting av midlertidige, mobile jakttårn for storviltjakt
- h. forsiktig rydding av småbuskar og kvist i siktelinjer ved faste jaktpostar i samband med storviltjakt

- i. drift og vedlikehald, samt istandsetting ved akutt utfall eller fare for akutt utfall på eksisterande energi- og kraftanlegg inntil verneområdet
- j. oppgradering eller fornying av kraftleidningar for heving av spenningsnivå og auka linetverrsnitt, når tiltaket ikkje skader verneverdiane nemnt i verneføremålet nemneverdig
- k. naudsynte tiltak ved akutt behov for istandsetjing på eksisterande vannkraftanlegg. Det skal i etterkant sendast melding til forvaltningsstyresmakta.

§ 5 Regulering av ferdsel

All ferdsel skal skje varsamt og ta omsyn til vegetasjon, dyreliv og kulturminne.

I naturreservatet gjeld følgjande reglar om ferdsel:

- a. Motorisert ferdsel er forbode, medrekna landing og start med luftfartøy.
- b. Sykling, riding og bruk av hest er forbode, utanom på eksisterande stiar og traktorveggar avmerkt på vedlagte vernekart.

§ 6 Generelle unntak frå ferdselsreglane

Ferdselsreglane i § 5 er ikkje til hinder for gjennomføring av militær operativ verksemd og tiltak i samband med ambulans-, politi-, brannvern-, rednings- og oppsynsverksemd, samt gjennomføring av skjøtsels- og forvaltningsoppgåver som er bestemt av forvaltningsstyresmakta.

Unntaket gjeld ikkje øvingsverksemd.

Ferdselsreglane i § 5 andre ledd er ikkje til hinder for

- a. naudsynt motorferdsel for uttransport av sjuke og skadde bufe. Køyretøyet skal vere skånsamt mot markoverflata. Det skal sendast melding til ansvarleg oppsyn for verneområdet i forkant av køyring
- b. naudsynt uttransport av felt elg og hjort med lett beltekøyretøy som ikkje set varige spor i terrenget, og med traktor og ATV på traktorveg avmerkt på vedlagte vernekart
- c. landing og start med Forsvaret sine luftfartøy
- d. naudsynt motorferdsel i samband med akutt utfall eller fare for akutt utfall på eksisterande energi- og kraftanlegg inntil verneområdet. Ved bruk av motorisert transport skal det i etterkant sendast melding til forvaltningsstyresmakta.
- e. naudsynt motorferdsel i samband med tiltak ved akutt behov for istandsetjing på eksisterande vannkraftanlegg, jf. § 4 bokstav j. Ved bruk av motorisert transport skal det i etterkant sendast melding til forvaltningsstyresmakta.

§ 7 Spesifiserte dispensasjonsreglar

Forvaltningsstyresmakta kan etter søknad gi dispensasjon til

- a. istandsetting, vedlikehald og skjøtsel av kulturminne
- b. tiltak i samband med forvaltning av vilt
- c. naudsynt uttransport av felt elg og hjort med andre køyretøy enn lett beltekøyretøy som nemnt i § 6 andre ledd bokstav b
- d. oppsetting og vedlikehald av gjerde
- e. avgrensa bruk av naturreservatet for aktivitetar nemnt i § 3 bokstav d
- f. naudsynte tiltak for drift, vedlikehald og sikring av eksisterande vannkraftanlegg
- g. oppgradering og fornying av kraftleidning som ikke fell inn under § 4
- h. naudsynt motorferdsel i samband med drift og vedlikehald, samt oppgradering og fornying av eksisterande kraftleidning
- i. øvingskøyring for føremål nemnt i § 6 første ledd
- j. naudsynt motorferdsel i samband med aktivitetar etter § 4 bokstav d og f og § 7 bokstav a, b, d og f.

§ 8 Generelle dispensasjonsreglar

Forvaltningsstyresmakta kan gjere unntak frå forskrifta dersom det ikkje strir mot føremålet med vernet og ikkje kan påverke verneverdiane nemneverdig, eller dersom omsyn til tryggleik eller omsynet til vesentlege samfunnsinteresser gjer det nødvendig, jf. naturmangfoldloven § 48.

§ 9 Skjøtsel

Forvaltningsstyresmakta, eller den forvaltningsstyresmakta bestemmer, kan sette i verk tiltak for å oppretthalde eller oppnå den natur- eller kulturtilstand som er føremålet med vernet, jf. naturmangfoldloven § 47.

§ 10 *Forvaltningsplan*

Det kan utarbeidast forvaltningsplan med nærare retningsliner for forvaltning av naturreservatet. Forvaltningsplanen kan innehalde nærare retningsliner for gjennomføring av skjøtsel.

§ 11 *Forvaltningsstyresmakt*

Gol kommune er forvaltningsstyresmakt etter denne forskrifta.

§ 12 *Ikraftsetting*


Denne forskrifta trer i kraft straks.


Vedlegg

Vernekart Robøle naturreservat [PDF]

Robøle naturreservat

Gol kommune, Buskerud fylke

 Grense for verneområdet


 Traktorvei, jf. verneforskrift

Målestokk: 1:5 000 i A4

Ekvidistanse: 5 m

Koord.sys.: ETRS 1989 UTM sone 32

Grunnkart: Kartverket, Geovekst og kommunene
- Geodata AS



Klima- og miljødepartementet, juni 2026

